

Բազմաթիւնեաց շրջանի Հայոց բանակը բաղկացած էր սերնդից սերունդ ռազմական գործի հետ կապուած, մերօրեայ բնութագրմամբ՝ արհեստավարժ զինուորականներից, պատերազմի ժամանակ հաւաքագրուող աշխարհագորից եւ վարձու զինուորներից: Բանակի հիմքը, ռազմական աւանդոյթների կրողը գլխավորապէս զինուորականների դասն էր, որի աչքի ընկնող հատուածը կազմում էին ազատները¹:

Միջնադարեան Հայ իրականութեան մէջ ազատ բառը, որպէս սոցիալական տերմին, եղել է հասարակութեան վերնախաւը, ողջ արտօնեալ դասը բնորոշող տերմին: Նեղ առումով ազատը դարձել է թագաւորի եւ նախարարների հետ գերակայ-ստորակայական (սիւղերեն-վասալային) յարաբերութիւններով կապուած մանր հողատէրերի համար բնութագրական տերմին: Քանի որ մանր հողատէրերի համար գլխավորը յօգուտ իրենց գերականների կատարած զինուորական ծառայութիւնն էր,

այդ պատճառով էլ մանր հողատէրերի հիմնական զբաղմունքը դարձել է ռազմական գործը, իսկ նրանց համար յատկանշական ազատ բառը վերածուել է զինուորական դասի անդամների համար բնութագրական տերմինի:

Ազատները ներկայացնում էին աւատատիրական աստիճանակարգութեան ստորին աստիճանը: Վաղ միջնադարում նրանք անցումային տեղ էին զբաղեցնում նախարարների եւ գիւղացիութեան միջեւ, տնտեսապէս ու քաղաքականապէս կախուած էին նախարարներից, բռնչիւններից եւ թագաւորից: Ազատների փոխյարաբերութիւնը նախարարների եւ թագաւորի հետ գերակայ-ստորակայական բնոյթ էին կրում, ազատները իրենց ստացած հողակտորների դիմաց զինուորական ծառայութիւն էին կատարում: Ազատները կենտրոնական իշխանութեան գլխավոր յենարանն էին եւ կազմում էին բանակի լաւագոյն մասի՝ այրուձիի հիմքը²:

Զարգացած աւատատիրութեան դարաշրջանում եւս ազատների դասի մէջ ընդգրկուելու համար զինուորականը պէտք է ստորակայական ծառայութեան անցնէր թագաւորի կամ որեւէ իշխանի մօտ: Ծառայութեան մէջ մտնելն իրական-

1 Ազատ բառը իրանական ծագում ունի եւ սկզբնապէս նշանակել է ազատ՝ ի հակադրութիւն անազատների: Որպէս սոցիալական տերմին՝ ազատ բառն ունեցել է երկու հիմնական իմաստ՝

- 1. համայնքի, տոհմի անդամ, քաղաքացիական իրաւունքներով օժտուած անձ.
- 2. յայտնի տոհմի անդամ, բարձրաստիճան ազնուականութեան ներկայացուցիչ:

Առաւել տարածուած է եղել ազատ բառի օգտագործումը իր երկրորդ իմաստով: Ազատը մատնանշել է բարձրաստիճան տոհմի անդամի (տե՛ս Ա. Գ. Периханян, *Сасанидский судебник*, Ер., 1973, ст. 445; *еже*, *Материалы к этимологическому словарю древнеармянского языка*, часть I, Ер., 1993, ст. 54):

2 Տե՛ս Ն. Աղոնց, *Հայաստանը Յուստինիանոսի դարաշրջանում*, Եր., 1987, էջ 527-533. Յ. Մանանդեան, *Երկեր*, հտ. Բ, Եր., 1978, էջ 342. Խ. Սամուէլեան, *Հիմ հայ իրաւունքի պատմութիւն*, հտ. I, Եր., 1939, էջ 221. Ա. Գ. Сукнасян, *Общественно-политический строй и право Армении в эпоху раннего феодализма (III-IX вв.)*, Ер., 1963, ст. 106; *Հայ ժողովրդի պատմութիւն*, հտ. II, Եր., 1984, էջ 138:

նացում էր երդման յատուկ արարողութեամբ: Գերակայ իշխանի եւ զինուորական ազատի միջեւ կնքուած էր համաձայնութիւն, որը հայկական աղբիւրներում կոչւում է դաշինք, ուխտ, միաբանութիւն ուխտի, ուխտ սիրոյ³: Միաբանութեան ուխտը կնքուած էր գրաւոր պայմանագրի միջոցով⁴, որտեղ նշուած էին կողմերի իրաւունքները եւ պարտականութիւնները:

Արեւմտեան Եւրոպայում եւս երդման արարողութիւնը կազմում էր վասալ-սիւղերենային յարաբերութիւնների հաստատման անբաժան մասը: Հանդիսաւոր արարողութեան ժամանակ զինուորականին շնորհուած էր ասպետի կոչում⁵:

3 Ռ. Մաթեոսեան, *Բագրատունեաց Հայաստանի պետական կառուցումը ու վարչական կարգը*, Եր., 1990, էջ 52-53

4 Ազատի եւ արա գերակայի միջեւ կնքուած գրաւոր պայմանագրերի մասին յիշատակութիւններ չունենք, բայց յայտնի է, որ Բագրատունեաց թագաւորութեան շրջանում գերակա-ստորակայական յարաբերութիւններին ընդհանրապէս, կոնկրետ թագաւորի եւ իշխանների փոխյարաբերութիւններին բնորոշ է եղել գրաւոր համաձայնագրերի կնքումը: Այսպէս, Գեղարքունեաց Վասակ իշխանը, երկիրը Վաղարշ (914-928) արքայից՝ արա ներկայանալու համար պահանջում է երդմագիր՝ «յետկար երդման» (տե՛ս Յովհաննէս Գրասխանակերտցի, *Պատմութիւն Հայոց*, www.digilib.am): Մէկ այլ օրինակ. երբ Սահակ Սեադա իշխանը ապստամբում է, Աշոտ Բ-ն արա երդմագրի ձեռագիրը՝ «յետկար քարտիս», իր հետ տանում է մարտի դաշտ: (տե՛ս *ճոյն տեղում*): Այս պայմանագրերի գոյութիւնը մեզ հիմք է տալիս եզրակացնելու, որ ազատների եւ արա գերակայ իշխանների միջեւ ճոյնապէս կնքուել են անաստիպ գրաւոր երդմագրեր:

5 Ասպետի կոչման շնորհման արարողութիւնը եւրոպական երկրներում միանման չէր, այն ունէր իր առանձնապատկերները: Դրանցում ընդհանուրն այն էր, որ ասպետի կոչում ստացող զինուորականի ուսին խորհրդանշական ձեւով «թրով հարուածում էին» եւ արտասանում հետեւեալ բառերը՝ «Յանուն Աստուծոյ շնորհում եմ քեզ ասպետի կոչում» (տե՛ս Դ. Թ. Денисон, *История конницы*, militera.lib.ru/h/denison/index.html, Ж. Ж. Рух, *История рыцарства*, М., 2004, ст. 57):

Միաբանութեան ուխտը կնքուած էր Աւետարանի եւ խաչի վրայ կողմերի երդմամբ: Այսպէս, օրինակ, 850 թ. Հայոց իշխան Բագարատ Բագրատունին Աղճնիքում տիրող արաբ ամիրայ Մուսա Իբն Ջուրարայի դէմ պատերազմելու համար օգնական զօրք խնդրեց Վասպուրականի գահերէց իշխան Աշոտ Արծրունուց. «Իբրեւ յանդիման եղին դեսպանքն մեծ իշխանի Աշոտոյ, եւ ընթերցաւ զգիր պաղատանացն եւ զյիշատակարան նախնեացն, եւ զմերձակորութիւն հարազատութեանն եւ զկապակցութիւն ուխտին որ ընդ միմեանս երդմամբք հաստատեալ սուրբ Աւետարանաւն եւ տէրունական նշանաւն՝ Համագունդ ժողով առնէր ամենայն աշխարհին եւ ամենայն նախարարօք Վասպուրական տէրութեանն»⁶: Թէեւ այս վկայութիւնը անմիջականօրէն չի առնչուած ազատի եւ իշխանի միջեւ համաձայնութեան կնքմանը, բայց, ինչպէս յայտնի է արեւմտաեւրոպական իրականութիւնից, ազատի եւ իր գերակայի միջեւ եւս հաստատուած էին այդպիսի յարաբերութիւններ: Իսկ գերակայ-ստորակայական յարաբերութիւնների ընդհանուր բովանդակութիւնը, հաստատման ձեւը գրեթէ նոյնն էր՝ անկախ կողմերի հասարակական դիրքից:

Ազատներից էր կազմուած գերակայի անձնական զօրագունը, որն առանձնաւոր էր տուեալ իշխանին ենթակայ տիրոյթներից հաւաքագրուող զօրքի մնացած հատուածից՝ որպէս արհեստավարժ, առաւել մարտունակ եւ վստահելի զօրագունդ. «Գուրգէն ընթացեալ զհետ Հանդիսի պատերազմող նահատակութեանցն, անդուլ լինելով զցայգ եւ զցերեկ Հանդերձ որ ընդ նմա միաբանեալ ազատագունդ զօրացն, եւ ոչ ըստ տեղիս տեղիս ցուցանէին զհանդէս մարտիցն եւ զյաղթութեանն քաջութիւն, այլ բոլորովիմբ ամենայն ուրեք ա-

6 Թովմայի վարդապետի Արծրունոյ Պատմութիւն տան Արծրունեաց, - www.digilib.am:

խոյանարձակ սլացմամբ ընթանայր. եւ իբրեւ զմի անձն, վառեալ ի զէն եւ ի սուր եւ ի ճակատամարտ՝ Հասեալ յամուրս՝ տապալէր զզօրութիւն նոցա սրով եւ աղեղամբ, ի փայլիւն սուսերի եւ նիզակի եւ ի գիշերամարտ նահատակութեան»⁷, - գրում է Թովմա Արծրունին:

Զօրքի Հաւաքագրման ժամանակ առաջինը գերակայ իշխանի մօտ էին ժամանում ազատները. «Իսկ գահերէց իշխանն Սիւնեաց Սմբատ ժողովեալ զեղբարս, զագագայինս իւր եւ զազատագունդ զօրս ամենայն իւրոյ իշխանութեանն»⁸: Ազատների զօրագնդերը յիշատակում են զօրքի մնացած Հատուածից առանձին. «Յայնժամ (Դաւիթ Կիւրոպաղատը - Կ. Ո.) Հրամայեաց ժողով լինել զօրաց իւրոց զազատս եւ զամենայն հեծելագօրս իւր»⁹:

Ռազմական ծառայութեան Հետ էր առնչուում ազատների հետեւեալ պարտականութիւնը. նրանք պէտք է իրենց սեփական կալուածքներում զօրահաւաք կազմակերպէին եւ իրենց տիրոջներէն Հաւաքագրուած զինուորներին առաջնորդէին մարտի դաշտում: Պատերազմական վտանգի դէպքում ազատը գերակային էր ներկայանում զինուորների հետ միասին: Նկան բերդում ամրանալու ժամանակ Աշոտ Արծրունի իշխանի հետ էին նրա ազատները իրենց զօրքերով. «եւ որք ընդ նմա էին գունդք ազատաց եւ նոցին զօրաց ըստ տոհմս ազգաց»¹⁰: Գուրգէն Ապուպելիճի Հրամանատարութեան տակ գտնուող ազատները Արեան լճի ճակատամարտին մասնակցում էին իրենց զօրքերով. «եւ ընդ նմա բազմութիւն ազատաց

եւ մեծամեծացն Արծրունեաց նախարարութեանց եւ ամենայն զօրաց նոցա»¹¹:

Գերակայի բացակայութիւնը բացասաբար էր ազդում ազատների մարտունակութեան, կազմակերպութեան վրայ: Նման իրավիճակ ստեղծուեց Դերենիկ Արծրունու մահից յետոյ, երբ նրա ազատները ցրուեցին. «Վասն զի ազատագունդ զօրքն տիրակորոյսք ցրուեալք ի լերինս եւ ի դաշտս վայիւք եւ ողբովք եւ յորդահոս արտասուօք զերկիրն լրացուցանէին դառնութեամբ»¹²:

Ազատները կատարում էին նաեւ այլ ծառայութիւններ: Դրանցից յատկապէս կարեւոր էր թիկնապահական ծառայութիւնը, որը ազատները իրականացնում էին մշտապէս՝ ե՛ւ խաղաղ, ե՛ւ պատերազմական իրավիճակներում: Այսպէս, Աշոտ իշխանի ազատներից Վահրամը յիշատակում է որպէս նրա թիկնապահ. «Իսկ իշխանն Աշոտ, առ սակաւ սակաւ ամփոփեալ ընտանեօք իւրովք, եւ ընդ նմա ոմանք յազատաց իւրոց եւ Վահրամ սեպուհ թիկնապահ իշխանի»¹³:

Ազատների զինուորական Հաւատարիմ ծառայութիւնը ներառում էր նաեւ գերակայի ընտանիքի պաշտպանութիւնը, նրա զաւակների հանդէպ հոգատար վերաբերմունքը, գերակայի որդիներին ռազմական արուեստին ծանօթացնելու պարտականութիւնը: Այս ամէնը յստակ երեւում է Վասպուրականի գահերէց իշխան Դերենիկ Արծրունու (875-885) մահից յետոյ նրա ազատների վարքագծից, որոնք իշխանի որդիների հանդէպ ծառայական պարտականութիւններ էին կատարել. «լաւ Համարեցան զկեանս պանդխտութեան յօտարութեան առնել, քան տեսանել կապեալս արգելեալս ի բանդի զորդիս իշխանին իւ-

7 Նոյն տեղում, էջ 99
 8 Պատմութիւն Ասիական արարեալ Ստեփաննոսի Օրբելեան արքայիսկոպոսի Սիւնեաց. - www.digilib.am
 9 Մատթէոս Ռոմայեցի, Ժամանակագրութիւն, - www.digilib.am
 10 Թ. Արծրունի եւ Անանու, էջ 66

11 Նոյն տեղում, էջ 72
 12 Նոյն տեղում, էջ 132
 13 Նոյն տեղում, էջ 66

րեանց, զիշխան աշխարհիս. որոց սրտի մտօք ի մանկութենէ զհարկ ծառայութեան Հատուցեալ էին ըստ օրինի վայելչութեան Հնազանդողաց եւ Հնազանդելոց»¹⁴:

Գերակայ իշխանները դրամական միջոցներ էին յատկացնում իրենց ազատներին Հաւատարիմ ծառայութեան, պաշտօններ վարելու դիմաց: Այս երեւոյթը Հայաստանում լայն տարածում չունէր. այդ է վկայում Աշոտ Արծրունու կողմից իր ազատներից իւրաքանչիւրին սեփական գանձարանից ամէն տարի պարգեւներ բաժանելը, որը նախկինում այլ իշխաններ չէին կատարել. «զի ըստ իւրաքանչիւր Հասակաց՝ զմի մի ոք ի ձէնջ զթալիր սիրով մեծարէի այնչափ, զի եւ զմեծութիւն ընչից, որ ի գանձս իմ՝ ամի ամի յաւար տալով՝ զուարթամիտ սրտիւ ինձ Համարէի զյափշտակութիւնն տան իմոյ որ ի ձէնջ եւ առ ձեզ, զոր ոչ եւ զմի ոք յիշխանաց ոմանց առաջնոց լուեալ ուրուք, եթէ իցէ այսպիսի ինչ արարեալ. եւ ես ամայացեալ ոչ ինչ փոյթ առնէի, միայն ձեզ զլիանալն սիրելով առ այսօքիւք»¹⁵:

Եւրոպայում Հաւատարիմ ծառայութեան կարեւոր նախապայման էր Համարում գերակայի շնայութիւնը, ստորականներին պարգեւատրելու կարողութիւնը¹⁶: Հայաստանում եւս գերակայ իշխանի կողմից ազատներին Հապահովելու դէպքում վերջիններս կարող էին հեռանալ եւ ծառայութեան անցնել այլ իշխանների մօտ: Այսպէս եղաւ Գրիգոր Դերէնի՝ Աշոտ Արծրունու հօր հետ, որի բոլոր ազատները հեռացան իրենից¹⁷:

Պատերազմների աւարտից յետոյ ազատները իրենց զինուորներով, ինչպէս

14 Նոյն տեղում, էջ 117
 15 Նոյն տեղում, էջ 68
 16 Г. Кенигсберггер, Средневековая Европа 400-1500 годв, М., 2001, стр.115.
 17 Պատմութիւն Ծապիոյ Բագրատունւոյ, - www.digilib.am

նշում են պատմիչները, վերադառնում էին իրենց տեղերը: Յովհաննէս Դրասխանակերտցին, նկարագրելով Թուղխի ճակատամարտը, նշում է, որ մարտից յետոյ զինուորներից իւրաքանչիւրը գնաց իր տեղը. «եւ այլ զօրքն ցրուեցան գնացին յիւրաքանչիւր տեղիս»¹⁸: Թովմա Արծրունին Մուսա իբն Ջուրարայի եւ Հայ իշխանների միջեւ ճակատամարտի մասին խօսելիս նշում է. «Դառնան զօրքն Հայոց մեծալ յաղթութեամբ եւ դառնային մեծաւ ուրախութեամբ եւ անտրտում խնդութեամբ յիւրաքանչիւր տեղիս»¹⁹: Պատմիչների նշած իւրաքանչիւր տեղերը ազատների բնակութեան վայրերն էին՝ նրանց ամրոցներն ու բերդերը:

Քանի որ ամրոցները եւ բերդերը ռազմական յենակէտեր էին, ապա դրանց մարտական պատրաստ վիճակում պահելու կարեւոր խնդիր էր: Ազատների պարտականութիւնը ամրոցի անվտանգութիւնը ապահովելն էր, թշնամու յարձակումների դէպքում ամրոցի պաշտպանութեան կազմակերպումը: Վասպուրականի գահերէց իշխան Աշոտ Արծրունին (885-904) Գագիկ Ապուրուհանի դէմ պայքարի ընթացքում Վան քաղաքի պաշտպանութեան կազմակերպումը վստահել էր Ակէացի տոհմից Թադեւոսին եւ Հիսէին. «...եւ զպատրաստութիւն պատերազմողական մարտի ամրոցին Հաւատացեալ էր Յիսէի եղբօր Թադէոսի, որոց Շերեփայ որդիք անուանէին, ի յԱկէացի տոհմէ, քաջամարտիկք եւ հմուտք պատերազմողական յարդարմանց»²⁰: Թովմա Արծրունին յիշատակում է ամրոցաբնակ ազատների, որոնց Գագիկ Ապուրուհանը պարգեւներ է բաժանում իր կողմը գրաւելու Համար²¹:

18 Յովհաննէս Դրասխանակերտցի, էջ 63
 19 Թ. Արծրունի եւ Անանու, էջ 56
 20 Նոյն տեղում, էջ 116
 21 Նոյն տեղում, էջ 116

Ազատներն ամրոցներում բնակուում էին՝ իրենց ընտանիքներով: Ատրպատականի Ափշին ամիրայի Հայաստան ձեռնարկած արշալանքի ընթացքում յիշատակուում են Կարսի բերդի ազատները, որոնք այդտեղ էին իրենց կանանցով եւ երեխաներով²²: Իւսուֆի արշալանքի ժամանակ ազատները Երնջակ բերդում ամրացել էին իրենց կանանց հետ միասին. «...զայ ի մարտ ընդ անառիկ ամրոցն Երնջակու, յորում կային պատուական տիկնայքն Սիւնեաց Շուշան եւ Սոփի եւ այլ բազում ազատ կանայք եւ ազատորեար»²³:

Բագրատունեաց թագաւորութեան ժամանակաշրջանում ազատների դասը միատարր էր, այլ բաղկացած էր մի քանի շերտերից: Ազատի դիրքը պայմանաւորուած էր նրա ծագմամբ, ժառանգական տիրոջը հետ, կոչումով: Ազատների վերնախաւը կազմում էին այն զինուորականները, որոնք սերում էին յայտնի նախարարական տոհմերից: Այս ազատները, որոնք յաճախ նախարարական տոհմերի ղեկավարներ եւ իշխաններ էին, ունէին տէր կամ իշխան տիրոջները. «Ջնոյն տեսեալ ազատացն Վասպուրականի... Յիսէ Տրունեաց տէր որդի Հոնաւարայ, Վարազշապուհ Աբելինից տէր, Թաղէոս Ակէացի Շերեփայ որդի»²⁴: Ստեփանոս Օրբէլեանը, խօսելով Սիւնեաց Սենեքերիմ թագաւորի ազատներից Հասանի եւ Մահաւանի մասին, նրանց կոչում է մեծ իշխան²⁵:

Մատթէոս Ուռհայեցին Վեստ Սարգիս Սիւնեցուն անուանում է Հայոց տան իշխան. «Եւ զկնի մահուանն Յովհաննիսի այր ոմն յիշխանաց տանն Հայոց, որ էր այր նենգաւոր, անուն ազատ Սարգիս

Հայկազն»²⁶: Տաթեւի վանքին Սիւնեաց գահերէց իշխան Փիլիպէի (821-848) կողմից արուած կտակագրում, որպէս վկաներ, յիշատակուած ազատների թւում են Փիլիպէ իշխանի որդիները, որոնք ունէին տէր տիրոջն. «Եւ վկայք լիցին տէր Մուշեղ՝ Սմբատայ որդի, տէր Վահան՝ Բաբգէնի որդի, տէր Բաբգէն եւ տէր Վասակ եւ տէր Աշոտ՝ իմ Փիլիպպէի որդիք»²⁷: Թովմա Արծրունին ազատների վերնախաւի ներկայացուցիչներին անուանում է Ասիւսապետք ազատաց²⁸:

Ազատների վերնախաւի ներկայացուցիչները կոչուում էին նաեւ գլխաւոր ազատներ. «Իսկ մի ոմն ի գլխաւոր ազատացն Հայոց Սարգիս անուն»²⁹: Գլխաւոր ազատների շարքում էին Հայոց Բագրատունի թագաւորի անմիջական ստորակայ իշխանները, որոնք անուանուում են նաեւ Հայոց տան ազատներ. «Իսկ որք առաքեցան առ վարդապետն Հայոց, Գրիգոր Մագիստրոսն որդին Վասակայ եւ Հայկազնին մեծն Սարգիս եւ այլք ոմանք յազատաց տանն Հայոց»³⁰: Հայոց տան ազատները յիշատակուում են Գագիկ Բ-ի (1042-1045) թագաւորման կապակցութեամբ. «Իսկ Վահրամ այր հզօր եւ անուանի, եւ բարեպաշտութեամբ յոյժ վեհ, որպէս թէ ոչ ոք հաւասար նմա Պահլաւ հանդերձ իւրովք ազգակցօք, որդուովք եւ եղբորորդուովք իբրեւ երեսուն ազատօք ոչ միաբանեցան ընդ նմա. այլ կոչեալ առ ինքեանս զԳագիկ որդի Աշոտոյ, թագաւորեցուցին ի վերայ իւրեանց»³¹:

Ազատների դասի յաջորդ շերտը կազմում էին ազնուականութեան ամենացածր

26 Մ. Ուռհայեցի, էջ 36
 27 Ս. Օրբէլեան, էջ 85
 28 Թ. Արծրունի եւ Անանու, էջ 67
 29 Մ. Ուռհայեցի, էջ 18
 30 Նոյն, էջ 28
 31 Արիստակէս Լաստիվերցի, Պատմութիւն, - www.digilib.am

22 Ստեփանոսի Տարսնեցոյ Ասողկան Պատմութիւն տիեզերակա՞ւ.- www.digilib.am
 23 Ս. Օրբէլեան, էջ 78
 24 Թ. Արծրունի եւ Անանու, էջ 117
 25 Ս. Օրբէլեան, էջ 138, 139

խաւին պատկանող կամ հասարակ ծագում ունեցող զինուորականները, որոնք նախապէս կոչուում եւ ընդարձակ կալուածքներ չեն ունեցել, բայց կարողացել են ձեռք բերել դրանք, իրենց հաւատարիմ ծառայութեան եւ ռազմական տաղանդի շնորհիւ:

Ազատների մի մասը տիրոջներ եւ կոչումներ չունէր: Փիլիպէ իշխանի կտակագրում յիշատակուում են նաեւ կոչում չունեցող ազատներ. «Հուռ, Քուրդոյ, Խոսրով՝ Շապուհոյ որդիք, Ջեւանշէր՝ Թէոդորոսի որդի, Աշնակ՝ Վահանայ որդի, Զագիկ՝ Վահանայ որդի, Վարդան՝ Ջանադայ որդի, Սահակ՝ Վասակայ որդի, Միհրան՝ Թորքայ որդի, Յովհան՝ Ներսէհի որդի, Հասան՝ Շապուհոյ որդի, Վահան՝ Միթիթարայ որդի»³²: Այս ազատների համար կրեւորը անձնական յատկանիշներն էին, որոնց շնորհիւ նրանք երբեմն հրամանատարական պաշտօններ էին զբաղեցնում: Ազատների վերնախաւի համար այս երեւոյթը անընդունելի էր, քանի որ աւանդոյթի ուժով հրամանատարական պաշտօնները տրուում էին ազատների վերնախաւի ներկայացուցիչներին: Վասպուրականի թագաւոր Դերենիկ Արծրունին (943-958) Ապլղարիպ Հաւնունուն զրկում է սպարապետի պաշտօնից եւ նրա փոխարէն նշանակում իր ազատներից Սարգիս անունով մէկին³³: Այն փաստը, որ հասարակ ծագումով ազատը աւելի բարձր է դասուել, քան ինքը, խիստ վիրաւորում է Ապլղարիպին եւ վերջինիս դաւաճանութեան պատճառ է դառնում:

Ազատների դասին բնորոշ եւս մի յատկանիշ էր զինուորական գործի ժառանգաբար փոխանցման աւանդոյթը: Ազատների որդիները մանուկ հասակից յատուկ ռազմական պատրաստութիւն էին անցնում, ծանօթանում ռազմական ա-

32 Ս. Օրբէլեան, էջ 85
 33 Մ. Ուռհայեցի, էջ 13

րուեստին: Թովմա Արծրունու Պատմութիւնը շարունակող հեղինակը նշում է, որ Գագիկ Արծրունին դեռ 15 տարեկան չկար, բայց տիրապետում էր զինուորական գործին³⁴: Այս վկայութիւնը հիմք է տալիս կարծելու, որ ազատորդիները 15-20 տարեկան ազնուական, իշխանական ընտանիքների երիտասարդներն էին: Նրանք իրենց ծառայութիւնը սկսում էին՝ որպէս իշխանների թիկնապահներ, եւ այդ տարիքից արդէն ներգրաւուած էին ռազմական բնագաւառի մէջ. «Եւ մանկուք ձեռասունք թիկնապահք եւ յորս յենոյր իշխանն ձեռօք իւրովք», այն փաստը, որ իշխանը (Դերենիկ Արծրունին - Կ. Ո.) յենուում էր իր երիտասարդ թիկնապահների վրայ, նշանակում է, որ նրանք թէեւ սկսնակ, բայց յուսալի եւ պատրաստուած զինուորականներ էին: Աղբիւրներում ազատորդիները, որպէս զինուորականութեան ձեւաւորման ընթացքի մէջ գտնուող խումբ, յիշատակուում են առանձին՝ ազատների եւ միւս դասերի կողքին. «զիշխանս եւ զտեարս կողմնակալս եւ զկուսակալս աշխարհին, զազատս եւ զազատորդիս»³⁵: Բուղայի արշալանքի ժամանակ Գուրգէն Ապուլպելճ Արծրունու բանակում յիշատակուում են նաեւ ազատորդիները. «բագմութիւն ազատաց եւ ազատորդեաց եւ նոցուն զօրաց քաջաց Վասպուրական տէրութեանս»³⁶: Վասպուրականի թագաւոր Սենեքերիմը իր որդի Դաւթին Կոստանդնուպոլիս ուղարկելիս նրա հետ ճանապարհում է նաեւ ազատների որդիներին՝ որպէս օգնական զօրք. «...Եւ առաքեաց թագաւորն Վասիլ առ Սենեքերիմ առաքել առ նա զԴաւիթ թագաւորական ճոխութեամբ եւ առաքեաց զորդին իւր, ընդ նմին եւ որդիս ազատաց»³⁷:

34 Թ. Արծրունի եւ Անանու, էջ 135
 35 Նոյն տեղում, էջ 63
 36 Նոյն տեղում, էջ 68
 37 Մ. Ուռհայեցի, էջ 20-21

Արեւմտեան Եւրոպայում ազատորդի- ներին համապատասխանում են զինակիր- ները, որոնք 14-15 տարեկանից հմտանում էին ռազմական գործի մէջ: Մի քանի տա- րի ծառայելուց յետոյ, եթէ տուեալ զինա- կիրը աչքի էր ընկնում քաջութեամբ, նա իր սենեորից խնդրում էր ասպետի կոչում շնորհել իրեն³⁸:

Այսպիսով, Բագրատունեաց թագաւո- րութեան հռչակումից յետոյ ազատների դասը Հայաստանում Թ-ԺԱ դարերում

ձեռք էր բերել որակական նոր յատկանիշ- ներ, յստակ կանոնակարգուել էին ազատ- ների պարտականութիւններն ու իրա- ւունքները: Ունենալով գործունէութեան կանոնակարգուած, համընդհանուր ընդու- նելութիւն գտած սկզբունքներ, հանդիսա- նալով բարձրաստիճան զինուորականներ՝ ազատները, յատկապէս՝ նրա վերին շերտը, առանձնանում էին զինուորականութեան ներսում եւ հասարակութեան մէջ՝ որպէս ինքնամփոփ, փակ հասարակական դաս:

38 Д. Т. Денисон, История конницы, militera. lib.ru/h/denison/index.html. Ж. Ж. Руа, История рыцарства, М., 2004, ст. 49.

ՄԱՐԱՏ ՄԱԳԻՍՏՐՈՍ

Կարէն Մաթեոսեան

Անիի Բագրատունեաց թագաւորու- թեան Ժ դարի վերջերի եւ ԺԱ դարի սկզբների զինուորական գործիչ եւ եկեղե- ցաշինարար Սմբատ Մագիստրոսի վերա- բերեալ երկու փաստ է յայտնի: Առաջինն այն է, որ նա 998 թ. Մմբոյ գիւղի մօտ տե- ղի ունեցած ճակատամարտում մահմեդա- կանների դէմ դուրս եկած քրիստոնէական միացեալ բանակի կազմում երկու այլ զօ- րավարների՝ Վահրամ Պահլաւունու եւ Ա- շոտ մարզպանի հետ գլխաւորել է Անիի թագաւորութեան 6000-անոց զօրամասը, եւ երկրորդը, որ 1010 թ. կառուցել է Անիի մերձակայ Բագնայրի վանքը:

Ո՞ր տոհմից էր սերում Սմբատ Մա- գիստրոսը: Յայտն եղած պատմագրական ողջ գրականութեան մէջ նա համարուել է սպարապետ Վահրամ Պահլաւունու որդին: Սակայն սկզբնաղբերների քննութիւնն այլ եզրակացութեան է յանգեցնում. պարզուել է, որ Վահրամ Պահլաւունին Սմբատ անունով որդի չի ունեցել եւ Սմբատ Մագիստրոսը միանգամայն այլ իշխանական տան ներկայացուցիչ է: Ծա- նօթանանք փաստերին:

1004 թուականին իր Տիեզերական պատմութիւնը աւարտած Ստեփանոս Տարօ- նեցի Ասողիկը գրում է այն մասին, որ Մամլան ամիրան հսկայական բանակով յարձակուել է Դաւիթ կուրապաղատի իշ- խանութեան վրայ, իսկ վերջինս գիմել է Հայոց եւ Վրաց թագաւորներին՝ օգնու- թեան խնդրանքով: Գագիկ Ա Բագրատու- նին (990-1020)¹ յատկացրել է վեց հազար

զինուոր, որոնց գլխաւորում էին երեք զօ- րավարներ: Այս հատուածը Ասողիկի Պատ- մութեան հրատարակութիւնից մէջբերելուց առաջ նշենք, որ այստեղ հետագայում ընդմիջարկութիւն է կատարուել, որը մա- սամբ փոխել է դրա բովանդակութիւնը:

Հրատարակութեան մէջ կարգուել ենք. «Եւ Գագիկայ յամենայն զօրացն Հայոց հատեալ զգունդ ԶՌ (6000) զընտիր ընտիր վառելոցն՝ գումարէ ի ձեռն իշխանաց իշ- խանին Վահրամայ, որդւոյ Գրիգորոյ Պահլաւունւոյ, որ զՄարմաշէն եւ զԲրգ- ներն շինեաց, եւ Սմբատայ մաժիստոսի, որդւոյ Վահրամայ, եւ մարզպանին Աշո- տոյ»²: Տողատակում հրատարակիչը նշում է, որ օգտագործուած օրինակներից մէկում եղել է այլ տարբերակ. «... իշխանաց իշ- խանին Վահրամայ որդւոյ Գրիգորոյ. եւ Սմբատայ մաժիստոսի որդւոյ Վահրա- մայ. եւ մարզպանին Աշոտոյ Պահլաւուն- ւոյ, որ զՄարմաշէն շինեաց. որ զԲրգներն շինեաց»³:

Այստեղ ընդմիջարկութեան գոյու- թեան մասին կուսհել է Հ. Ներսէս Ակի- նեանը: Նա գրում է. «Ինձի կը թուի թէ Ա- սողիկի բնագիրը ունեցած է լուսանցագ- րութիւններ, որոնք սխալմամբ բնագրին մէջ առնուած են. կ'առաջարկեմ կարգալ. «... որդւոյ Գրիգորոյ Պահլաւունւոյ, որ զՄարմաշէն շինեաց, եւ Սմբատայ մա- ժիստոսի որդւոյ Վահրամայ, որ զԲրգ- ներն շինեաց, եւ մարզպանին Աշոտոյ»⁴:

1 Ըստ Կ. Իզրազեանի՝ Գագիկ Ա-ը մահացել է 1017 թ. (К. Юзбашян, Армянские государства эпохи Багратидов и Византия IX-XI вв., М., 1988, ст. 156):

2 Ստեփանոսի Տարօնեցոյ Պատմութիւն տիեզե- րական, աշխ. Ստ. Մալխասեանցի, Սանկտ-Պե- տերբուրգ, 1885, էջ 270
3 Նոյն տեղում
4 Ն. Ակինեան, Ներսէս Լամբրոնացի, Վիեննա, 1956, էջ 358